

Gegewärtigs

Öbbis vo der Familie Schwizer.

D Familie Schwizer woont im e pfundig tolle Eigeheim, derzue ghört e pflägte Garten miteme grosse Puul.

Der Herr Schwizer het e guete Tschopp, er verdient ganz schön Mani-mani. Syner Frau het er uf die letschti Wienecht s Neuscht vonere Wäschmaschine, eini mit ere Sooftgwäbschtüurig kauft.

Färn het er zwar e paar schlooflosi Nächt gha, wägem Börse Cräsch.

Är isch e cuule Typ, au was er privat in d Händ nimmt tuet ihm groote.

S meischt woos in sym Heim zmache git, macht er sälber, er isch e typische Ollrauder. Das woon er derzue bruucht, holt er im e Duityuself Center.

Er het aber au no Hobbis. Er spiilt gärn Squosch und macht regelmässig ime Fitnesscenter Boodibilding.

Jede Morge bevor er ins Gschäft fahrt, goot er e Halbstund goo tschogge.

Im Summer, tuet er sich am Oobe in sym Puul entschpanne, am liebschte schwimmt er Kraul.

D Frau Schwizer isch Huusfrau, aber nit numme, si het dernäbe no e Teilzyt Tschobb.

Eimol in der Wuche goot si am Morge mit e paar Fraue go wooke.

In ihrer Freizyt nimmt sis läässig und macht in der Citi Schooping.

Si leit vill Wärt uf ihres Mek-ap und wäge däm goot si meischtens au grad no ine Bjutischop.

Am Oobe bim Färnsehluege, het si immer Gluscht gha uf Bauntis und Snickers oder süscht e chlyne Snek und dur das het ihre Boodi afe ganz schöni Kurven agleit gha. Wenn si derno vor im Spiegel gstanden isch und sich gseh het, het si sich gegeret und dänkt, du bisch doch ganz schön doof!

Am meischte het se ihres Doppelchini und der Hals gnärvt, die Pardie het zämen afen uusgseh wie d Vorderasicht vonere Schildchrott.

Do hets ere glängt, und si het sich lo ljfte.

S Schwizers hei au zweu Chind, d Jenny und der Patric.

D Jenny isch füzääni und e richtige Tyyni.

Im linge Naseflügel steckt e guldige Piirsing und uf im Rugge het si es chlys Tätuu.

Will si eso in d Hööchi schiesst brucht si allbott lengeri Tschyyns.

Geschter het si neumen im Uusverchauf es gäils nabelfreys Top kauft.

Si stoht uf Popmuusig und möcht emol Sängerin oder Model wärde, wäge däm bewirbt si sich für Castings und Foto-Schuutings.

Ihri Freyzyt verbringt si meischtens vor im Compiuter im Internet.

Vor e paar Tag het si dört drinn e neue Typ glehrt kenne, dä isch no Singel und kei Soffti, aber er het mega Fyling. Mit däm tuet si jeden Obe tschette und isch jetz ganz Häbbi.

Der Kevin goot in die vierti Klass, er isch e super Schüeler und rächt clever. Scho als Bebi isch er es läbhafte Bürschli gsi, me het ihn im Babysitter immer müessen abinde. Einisch isch er zum Böggi uusgfalle und het s Näsli verdätscht. Wenn er kei Schuel het, goot s Mammi öbbenemol mit ihm zum Mac-Donald, dört isst är am liebschten e Chiisbörger und s Mammi holt für sich Fritts und Schiken-Nukkets mit Ketschoup, und derzue trinke si e Cola.

Uf si letschte Geburtstag het er vo den Eltere es neus Händy übercho, jetz isch er immer am S,M.S. le . Wenn er znacht nit cha schloofe, nimmt er der Wookmen und loost no echly Saund. Wenn er älter isch möchte er emol Biitsch-wolley-ball spiile die Sportart findet är megasuper.

D Familie Schwizer het au Familiesinn und dä tuet si pfläage. Am Sunntig no im Brönsch nimmt jedes sys Maunten- Baik und denn faaren si uus und alli hei der Plausch.

In de grosse Ferie tschettet d Familie Schwizer mit irem Wohnmobil ans Meer. Dört hei si iires eige Segelboot. Mit däm mache si alben e Segeltörn, oder si tüeje söörfe.

Färn im Früelig hei s Schwizers ufere Alp in der Innerschwiiz e Chue glyyst, die isch super.

Si isch zwar nit e rassereini Schwizerchue, und heisst Sindy, aber si git mega Milch.

Im letschte Summer isch die ganzi Familie e Daag lang uf d Alp go Chueflaade verzettle und im Herbscht hei si derno vo der Milch, vier Läib Alpchees chönne goo reiche.

Öppen emol chunnt d Grossmueter uf Bsuech, die isch no rächt cuul, mit deer hei derno d Jenni und der Kevin der Plausch. Si spiilt mitene Monopoli und macht gärn Wörterspiili. Geschter Zoobe het si zum Bischpiil die beide Grosschind gfrogt, öb si wüsse was der Unterschiid zwüscheneme Charschtheuel und eme Nachtheuel isch, do hei Beidi e Bläkkaud gha.

Hüt isch s Groosi daun heigreist.